

良娣比開國侯保林比五等侯才人比駙馬都尉及永明元年有司奏貴妃淑妃竝加金章紫綬佩于寘玉淑妃舊擬九繅以淑爲溫恭之稱妃爲亞后之名進同貴妃以比三司夫人之號不殊蕃國降淑媛以比九卿七年復昭容位在九嬪焉梁武撥亂反正深鑒奢逸配德早終長秋曠位定令制貴妃貴嬪貴姬爲三夫人淑媛淑儀淑容昭華昭儀昭容脩華脩儀脩容爲九嬪婕妤容華充華承徽列榮爲五職美人才人良人爲三職東宮置良娣保林爲二職及簡文元帝出自儲蕃或迫在拘繫或逼於寇亂且妃竝先殂更不建椒闥陳武光膺天歷以朴素自居故後宮負位其數多闕文帝天嘉之後詔宮職備負其所制立無改梁舊編之令文以爲後法然帝性恭儉而嬪嬙不備宣帝後主無所改作今摠綴緒以立此篇云

宋孝穆趙皇后傳

宋孝穆趙皇后諱安宗下邳僮人也父裔平原太守后以晉穆帝升平四年嬪于孝皇帝以產武帝殂于丹徒官舍葬晉陵丹徒縣東鄉諫壁